

古田縣志卷之二十六

列傳

舊志有人物一門所以志古今之聞人其體制昉於許劭之人物志侯官陳衍謂人也而以物稱之頗譏其弗辭今依總局凡例作列傳凡一邑之中有氣節可欽行能可述者皆旁搜博採萃於斯篇上以鳴國家之盛下以增里閭之光也纂列傳

唐

劉疆天性仁厚素孚衆望時洞岷千餘戶歸之開元間與林溢林希等獻其地于天子願編戶爲縣元宗嘉其忠順仍使掌縣事未幾納職請吏于朝偕其子弟族人退居以俟朝命天子不欲

古田縣志

卷之二十六

列傳

五

奪其志詔有司敘其功德加其封爵使食祿于家疆友愛諸弟延及其下沒後邑人以其筆路山林迺疆迺畝風氣日開公卿輩出其功不可湮沒爲立廟號甯境歲時祭之

宋

余復字子叔寄籍甯德祖宗廬墓皆在邑大東鄉杉洋少從張翰學精周官紹熙元年對策大廷光宗稱其直而不訐拔置第一初復入都其父寄詩云明年三月開金榜早寄平安及第書若左券其必捷南宮者是復奉詩云爾一唱聲知是我從來頭上不容人人咸謂樞梓皆能無負期許甯宗卽位詔入史館兼實錄檢討著有禮記類說左氏纂類官歸覓佳勝辟園構軒以觴

詠終天年

唐璘字伯玉嘉定中進士有臺臣奏次對官不許論邊事璘對策極詆之調吳縣尉有殺人于貨挾其舟亡者有司求賊急屠者自告吾兒實殺之兒亦自誣服璘爲緩之後果得賊舉縣感服縣有勢家治圃將鑿渠通舟謬言古有渠常平使者主之璘視故籍則民田也力爭迂使者意移監縣稅璘遂以直聞調瑞州教授用白鹿洞教法崇禮讓後文藝士翕然知嚮改知晉陵縣擢監察御史璘以母老不欲就母曰吾有而兄在第盡言勿以吾爲憂璘拜謝就職召對緝熙殿首跪奏天變而至於怒民怨而幾於離海宇將傾天下有不可勝諱之慮陛下謂此何時縱

古田縣志

卷之二十六

列傳

二

欲累德文過飾非疏遠正人狎暱戚宦濁亂朝政自取覆亡宰相用時文之才爲經世之具不顧民命輕挑兵端不度事宜頓空國帑委政厥子內交商人賄塗大開小雅盡廢瑣瑣嫵姪敢預邪謀視國事如俳優以神器爲奇貨都人側目朝士痛心蓋正無將之誅以著不忠之戒毋使天變寢極人心愈離也上爲改容又請號召土豪經理荆襄亟擇帥臣安集淮西帝嘉納問邊事甚悉璘感激知遇自是彈擊無所避再疏言鄭清之妄庸誤國其子士昌招權納賄鄭性之懦而多私李鳴復甘心諂媚等語不報璘遂力丐外授廣西運判改知嘉興府尋升廣東經略安撫使梅州寇作璘示以威信寇尋息明年上章乞致仕朝

廷思之亟命入奏擢太常少卿母喪哀毀不食而卒璘立臺僅百日世擬之唐介云祀鄉賢

趙汝騰字茂實宋宗室寶慶二年進士累官秘書郎轉對言節用必先自乘輿宮掖始累遷禮部尙書兼給事中入奏言前後姦諛之臣傷善害賢自取要職何益陛下而深損於聖德興利之臣移東就西自遂谿壑何益陛下而深戕乎國脈則陛下私惠羣小之志可以息矣又言陛下有用君子之名無用君子之實拜翰林學士辭歸累召力辭以端明學士兼前翰林學士承旨知泉州卒贈四官諡忠清平生一言不妄發一錢不妄取朝廷嘗賜田宅以旌其廉與朱子素友善其題贊朱子像云理精義

## 古田縣志

卷之二十六

列傳

三

著德盛仁熟折衷羣言如射中鵠絕學梯航斯文菽粟在慶元初中行獨復後祀鄉賢

趙宗誼太宗四世孫元份商王孫濮王允讓第六子眞宗兄由建州徙居古田襲封濮國公官至昭化軍節度使同平章事薨贈太師中書令廣陵郡王加封恭憲漢王諡莊孝

張疆字定叟一字弱翁號象泉豪邁慷慨重風節好立功名以易義補太學生上書力詆宰相史嵩之擅政嵩之欲置之死賴理宗優容嵩之亦以是罷釋褐登第累遷國子監書庫官復率教官丁應奎楊朝南等上疏論丁大全誤國并諫遷都之失理宗皆納之祀鄉賢

蘇德載字厚叔博學善屬文有氣節寶祐四年與文天祥同登第時權貴用事士氣益靡賈似道叅知政事士皆造謁德載與天祥懷刺望門投之去賈銜之七月補迪功郎尉山陰尋調臨安監行在豐儲倉嘗與諸生葉李蕭規等講學於天目山因稱目山先生居頃之賈在鄂州敗績遣使詣蒙古師議和稱臣納幣匿其事詭以捷聞令館客廖瑩中撰福華編稱頌鄂功諸生乃改目山書院曰刺華齋會有星孛之變諸生應詔上書就德載受指意極詆賈似道專權蔽主妨賢崇佞辱國害民諸大罪賈怒嗾林安尹劉良貴誣葉李蕭規以金飾齋扁違制黥配遠州德載上書論救謂臺諫皆宰相私人學校乃國家元氣今兵衄

## 古田縣志

卷之二六

列傳

四

於外民譁於下陛下不知天變屢彰直言之詔甫下隨以辜加言者是懸諫鼓而監謗也疏入賈怒益甚謀以危法死之撫拾罪狀不可得因並坐齋扁皆其手筆謫潯州教授甲戌八月卒於官是月也臨安天目山崩天下悲之

李廣字夢授政和中以舍選登第雄勇有威名所在以李虎子目之始尉尤溪有捕寇功繼令惠安浦城倅建安方臘葉儂作亂敗之嘗出獄囚使破賊贖罪又嘗挺身獨往戢鹽寇之亂識呂頤浩於稠人中辭秦檜糧料之職不與黨禍自通仕郎至朝散大夫歷官十六任名績著一時惠安潮惠之民立祠祀之能詩尤長於碑記詞令之文退居十餘年卒祀鄉賢

余爰字良叔一字有聲慶元間登第授松陽尉歷贛州司理有循聲嘗捧檄他郡有士以金求薦引爰試以文藝頗明敏因諭之曰榮達自有分定君才如是何患不青紫乎吾家素清白毋以是相玷

高子昇字子雲嘉定初舉進士爲分甯尉累遷泉州僉判兼南外宗正簿以朝請郎主管崇道觀致仕靜退繕修爲時典型

鄭公玉字潤甫紹定間舉進士官終朝請郎潭州通判工詩文善評品人才尤好獎拔後進林咨美臨民有仁政祀鄉賢

章孝參字魯士淳祐間以舍選登第授德慶府教授有文行好獎勸後學洪天錫嘗稱爲大雅君子又嘗語人曰言規行矩玉質

## 古田縣志

卷之二十六

列傳

五

金聲章君是也祀鄉賢

明

章潤子時雨號白溪永樂中進士授刑部主事遷郎中斷獄數千無稱冤者時稱爲章鐵板居官十載宦囊蕭然所居弗蔽風雨御史王寶重其清節構屋居之有監司行縣任法嚴潤引諭諷解惶赧而去

曾斌字士均永樂九年舉人令遂昌有惠政正統間斌家居寇至竄山谷避之爲寇所獲中有遂昌人識之曰此故吾邑令民慈父也居官有善政未嘗一毫妄取於民願語羣賊舍之而去

陳敏政其先居浙之錢塘後遷吳興至敏政父任爲古田教諭因

家焉敏政以閩籍應宣德丙午鄉薦丁未成進士授潛江令丁外艱敏政奉櫬歸葬錢塘服除上官以本係浙籍改調閩縣令時有中貴人司閩市舶惡少避役者多竄匿其中敏政白而驅之沙縣尤溪寇亂流民多避入閩民擾甚敏政爲撫卹之所全活甚衆擢南康知府致仕卒葬古田子良器會浙籍鄉試登成化辛丑進士官福建布政使

林立字叔莊號雙溪爲諸生時入粵應徭洞亂詣其巢說服教以經史自是徭知向學兩臺使者以之食餼應懷遠縣歲貢司廣東陵水訓攝文昌篆以平黎功賜帑金擢四川梓潼令歷官十餘年能以經術飭吏治時有衆母之稱

## 古田縣志

卷之二十六

列傳

六

林果字希仲號確菴祖英洪武時御史見忠義傳順天中果以太學選襄陽府同知時兵荒果招撫賑卹民賴以安襄府官校不法果啓王治之卒於官士民思慕立祠祀焉刑部孔文英銘其碑

陳文衡宏治拔貢授廣東程鄉諭列憲廉其能擢署縣篆邑有兄弟爭產各以千金行賄正色拒之爲之均分立闔拈定人服其平允云

林叡字仕通宣德間以舉人授樂會教諭甫蒞任見學校俱草創卽白有司葺之擇諸生中穎秀者親授以經士始知學風化爲之一振丁外艱歸旋補電白教諭諸生被獎進者尤多考最當

擢乞休家居二十年卒

張文造宏治乙卯舉人授新甯令先是新甯多盜文造定方略設鄉長總統之村長分統之各鄉動息月朔必關報民間有不法無不先知以故令行禁止盜息民安擢戶部主事未赴卒於官民哀慕之後祀鄉賢

羅榮字志仁號蘂山弱冠登宏治庚戌進士授戶部主事奉使臨清歸擢員外郎尋升郎中會衡王請益莊田專鹽引榮力言其不可事得寢旋擢廣東參議以祝釐陳八事言甚剴切柳州馬平夷弗靖榮勦平之以功擢參政賜金綺尋轉左布政時災旱頻仍榮疏停採珠寬民賦以卹之應詔陳言凡十六事御史周

## 古田縣志

卷之二十六

列傳

七

謨篋篋不飭榮數與面爭爲所擠調貴州榮慨然曰古人有投荒萬里節勵而名益彰者吾何憚遠行爲抵任數月百廢俱舉以疾卒於官年四十九榮居官以才敏稱性長厚雖微賤必以禮接之而抑豪強絕私謁不屑隨時俯仰古田舊無城榮上議創築邑人至今德焉大司馬林瀚誌其墓祀鄉賢

高國定字一甫以老明經尙氣節有明末造秦晉楚豫俱爲盜區而門戶諸臣始終不解慨然曰今南北交訐在廷無一忘身發憤以紓君國憂者天下事去矣遂潔身不出日以吟詠爲事

余堂字志升號芝田以貢授進賢教諭有風節好吟詠尤諳河洛數以直道訓諸生人感其惠爲祀於贛州八賢樓

周鳴鐸字木生崇禎舉人甲申後屢辟不出築一草亭日以詩文自娛里人頌之有人間高士宅天上少微星之句

魏煥字文甫嘉靖乙酉舉人授臨江判奉院檄清查十三府有廉聲時窩盜恣橫渙計擒之民始安性慷慨重大節尤精書翰後因父年老乞歸養卒於家

林泮字東井郡庠雙溪子以名宦賢裔世勵清操嘉靖間倭寇亂閩慨然投筆從戎募鄉團登陣守禦寇平以功授都閩職有文武才卓然爲一郡大望生十子皆偉器京章其尤著也

陳必遂字成可號屏陽嘉靖己酉舉人授金華教諭總制胡梅林廉其才令署縣事會義烏兵嘯聚猖獗必遂力籌安撫民賴以

## 古田縣志

卷之二六

列傳

八

蘇上官奇之薦擢清平令喜振興學校有明經堂記勒於清平縣庠旋以歲饑請賑致忤上官遂歸家居杜門不出縣令譚汝賡時過門嘆曰林下令才見一人其欽慕如此著有寐言集二卷

高文徹字伯通氣質剛果投筆從戎兩適雲南整飭行伍本境創築城垣竭力董其事嘉靖間倭寇薄城率鄉團悉力禦寇賴以平

趙以祥字應和少孤貧以孝聞以歲貢授河南按察司經歷歲大飢獄囚多死以祥以粥哺之存活百餘人民呼爲佛爺按察使邵銳器重之輒令委決疑獄旋以憂歸林大輅送以詩有二年



宦况囊如洗之句服除改陝西按經歷以修三邊城堡功膺封典未幾卒於官按察使陳儒嘉其清苦遣屬吏爲具護櫬營葬之資縣令何世綸白於臺使給葬地焉

丁峴字鍾英性狷介以歲貢授興國訓導時興國文教不振登賢書者寥寥峴爲督課誘掖之士始嚮學是年秋闈獲雋者二人遷安遠教諭所造就如興國時後乞休歸諸生留戀不忍舍家居杜門不出時人稱之

林文養字邦賢以歲貢知恩縣縣素健訟文養下車得八百牘立爲判決虛者坐之在任九年案無留牘暇則偕邑士攜琴載酒遊名勝有以鷄豚進者文養却之曰宰何忍以遊故虛耗爾父

## 古田縣志

卷之二十六

列傳

九

老耶遂不復出

張仲賓字利用號冽泉以貢授括庠訓導旋調署松陽慶源皆有循聲上官以迪士愛民獎之薦擢和平令廉明有惠政卒於官秦恩字子推號華山以貢歷官雲和宣平武平無爲州訓導以清勤著學使白岳王有課士能評束修不問之褒乞休歸屢薦大賓士林重之

高銖字守大號豸峯由選貢任新建主簿以徵解却例金見重於郡守王華岡旋奉命委勘水災力請免稅民德之竟以秉直忤上官意左遷歸家居食貧晏如也

秦相字子輔性狷介篤志力學以選貢官某縣訓導轉教諭擢某

府教授以師道自任造士皆有程式及歸以餘囊散給族黨時人稱之

余文龍字起潛萬曆辛丑進士令衡陽擢守贛州署兵備道所至爲民興利除弊不遺餘力以循聲聞及歸葺學宮修城垣皆爲時所稱曹能始爲立傳董崇相誌其墓著有史轡史異行世祀

鄉賢

林國相字允卜以高等國子生歷官河南雲南布政司理問旋攝牧守篆素廉明嘗奉檄清查臨安事不取一錢竟以鯁直左遷代府長史解組後爲明倫祭酒者十五年士林重之

蘇一乾字六陽官湖廣永州衛參軍權知甯遠永明二縣事有廉

## 古田縣志

卷之二十六

列傳

十

名捐俸金修永州府庠是科登賢書者咸頌美焉奉命賜祭舜陵歲戊辰邑中饑米湧貴公減價平糶邑令劉若金以首義特旌焉

周于忠字淑盡初任四川儀隴主簿轉廣東雷州衛經歷升南海縣丞歲大饑佐縣尹賑濟捐金以千計民德之丁外艱歸粵民勒碑記其事

清

陳光煥字中文恩貢生任四川大竹令時蜀經兵燹戶口凋殘光煥勞來安集之民始復業蒞事年餘政簡刑清旋乞休歸閉門却掃耽心著述於周易性理尤精著有四書詮解易經摘要諸

書子堦字灼生順治戊子舉人授南宮令擢南昌府知府汰陋規除耗羨爲民興利除弊有政聲

陳超祚字子禧順治戊子舉人令郿縣兼攝岐汧二縣篆先是郿有先儒張橫渠祠爲橫渠行井田故處超祚蒞任見其牆圯井堙庀材修葺導澮洫而疆理之且爲其後裔元祥力請仍舊襲蔭屢修復古制勸士化俗以廉明公正著去之日三龍隴麋之民如失慈母鐫碑以三邑棠風歌咏德政云

曾懋蔚字文起號梧岡以拔貢任固原州同歷高郵州知州丁內艱服除補解州牧素峭直能得民以抑豪右罷官州人爲之叩閭者千數性恬雅好古宦遊所至率搜羅名人書畫以歸公餘

## 古田縣志

卷之二十六

列傳

十一

尤耽著述著有芸暉堂集

林九齡字爾尊性豪爽以生鼎革不樂仕進隱於半仙巖跡不到城市者四十餘年自號拙拙一叟

李夔隆字名嶼順治甲午武舉由橫海衛歷官霸州天津副將署居庸鎮總以威惠著兵民罔不悅服

林文煥字可章性清高值耿變隱小桃溪自號臥雲山人

姚相宋字九如官衡陽縣丞兩攝縣篆以清廉著子萬里字培公以拔貢生考授內閣中書轉刑部主事出爲平涼州知州擢嚴州府同知以經術飭吏治所至有循聲

陳鍾斗字聚伯順治辛卯庚子兩中副榜授定興令適大旱步禱

立兩人稱爲下車雨諸生馬楊武父仇讞者從殺人律鍾斗引經爲請得釋士林悅之祀於學宮秩滿晉平度州知州革陋規治逃人申嚴連坐之法時山左苦蝗獨平度境內有大鳥數百食蝗殆盡民不爲災歷灤州徐州知州擢長沙府知府潔已率屬所至有聲解任歸囊橐蕭然閉門讀書凡天文地理靡不精究時望推之子志周字袞生康熙癸卯舉人授靖安令初下車卽訪猾吏蠹胥置之法民賴以安爲立碑以誌其德季子志尙以歲貢任陽山訓導好誘掖後進時比之二方云

陳台斗字上伯順治庚子舉人任四川合江令初合江經寇賊蹂躪地方殘破台斗蒞任招集流亡輕徭薄賦惠農通商勤於撫

## 古田縣志

卷之二十六

列傳

十二

字士民德之

曾昌進字允公懋蔚子有氣節耿逆之變有僞兵曹王姓者勒助餉嚼以僞職不爲屈以選貢授秦甯教諭捐俸置學田日進諸生講論經術不輟會奉甯令疾知府張公稔其賢命署縣篆踰年遷興化教授丁外艱歸服除補漳州教授以卓異薦入覲賜袍擢鹽城令甫抵任卽却例金開市河以便商賈設義學以恤貧寒嗣奉部檄改任士民詣大吏挽留者數十大吏感之上其事得留任旋丁內艱歸至杭卒

陳正樂字韶生康熙庚申科舉人授沁源縣令勤於撫字盜息訟平遇荒歉極力賑貸民皆樂於完賦不用追呼大宗伯吳公太

原守王公廉其才特薦陞山西道監察御史未至京卒民爲之立碑誌遺愛焉

丁先聘字聘三康熙庚申舉人授奉新令知民間疾苦於一時利弊釐剔殆盡尤留意於振興學校俗爲之一變卒以木疆罷官時論惜之著有覺園集

丁式邦字藩南康熙乙酉舉人初授河南登封縣尹改署順昌教諭士林頌之曰璞玉渾金不事雕飾好學深思至老不息春風扇人雖離可卽其節概可想見矣後卒於官士皆爲之感涕陳射斗字又伯以恩貢任南豐縣丁丞內艱歸服除補束鹿縣丞有政聲以薦擢堂邑令值歲饑民食艱甚射斗多方設賑全活

## 古田縣志

卷之二十六

列傳

十三

甚衆民德之爲勒碑後以年老致仕歸

余義年字首五以拔貢充正黃旗教習丁內艱服除補鑲黃旗教習在都六年不輕投一刺大司成翁鐵菴深器重之秩滿知新鄭縣下車卽建義學捐薪米以贍貧士之不足者邑有無微糧久爲民累義年捐俸一千五百餘金抵解並豁免之歐陽文忠公墓在旌善鄉歲久就湮義年命工掘土得碑爲封其塚以廉靜勤慎課最中州第一巡撫鹿公將特疏薦之義年以老疾力乞致仕書八上始允其請鄉父老爭以竹輿迎入村獻酒果閱十日餘不得去遠鄉民尤以不得奉一卮酒爲恨後人持一錢製萬民衣以餽旋立祠於鳳台山左置田祀之著有四書講義

陳勤宣字宣三康熙庚午舉人初授安邱令未抵任丁內艱歸服除補長洲令下車卽捐金葺文廟長洲歲徵課四十五萬勤宣盡革漕例糧耗民受其惠遇有竊盜賭博則嚴懲約保以警其餘時布商設肆多招外地染匠姦猾屢出其中勤寔命設連環簿約四人共保無爲非事不守法者以連坐罪之爲牙販較定秤斛禁絕偏私商民便之有張鶴郎者方弱冠被宋景招拐賣於劉二旋挾入京其父訪知訟之勤宣卽拘劉二面質則稱鶴郎係王爺所買詞頗強橫卽禁繫之爲詳請於上官得查解放還又有男女幼時結婚及長而女父母以婿親喪家貧欲以女改適富戶因涉訟者勤宣審實捐給幣金斷令仍舊成配又有

## 古田縣志

卷之二六

列傳

十四

兩宦家之輿夫因爭毆斃命托人以千金行賄使入主者罪勤宣正色拒之次日詣城隍廟焚香自矢於神及庭訊得情遂只坐輿夫一人罪餘不問時聚觀者數千人莫不歎服因製冰清衡平召父復來二榜懸於廨癸巳分校秋闈所拔皆知名士後解組歸閉戶著書不問外事邑令蘇石麟表其門曰今之太邱年八十復杖策游姑蘇長洲士民遮道擁留者月餘年八十四卒勤宣家故貧而孝友恤孤備極周至生平一介不苟自爲諸生至入官無一人敢干以私者著有周易本義集解六卷約古集四卷騷賦彙解四卷文興探源錄四卷劍南軒詩集二卷余正健字乾行號惕齋康熙丙子鄉舉第一丁丑聯捷進士選庶

常授編修充史館纂修戊子典試河南所拔皆名雋御賜松花石硯命纂修詞譜遷宮允晉侍讀擢國子監祭酒課試甄別不少假尋假歸以撫臣張伯行疏薦督學江南至則條教不煩祇以正本澄源道在責己爲事各屬凜其風操苞苴請謁無一至者衡文窮日夕察其根柢而甲乙之有校士漱芳錄行世見諸生勗以行誼剴切溫醇士論稱其和而不流清而不刻尤以激揚爲任疏請范仲淹從祀孔子廟廷上廉其學守召爲順天府尹剔奸弊清囹圄巡視城濠勤於奉職數月晉秩副都御史兼府尹事奉命督學雲南疾作予告回籍歸至臨清卒正健事母及兄以孝恭聞爲諸生食貧課讀以古賢自期對生徒講說必

## 古田縣志

卷之二十六

列傳

十五

正衣冠危坐笑嘖不苟歟歷中外恭慎小心於卑賤無所狎於權貴無所貶垂二十年如一日乾隆庚午巡撫潘思桀疏請崇祀鄉賢著有敬義齋集

丁任俊字子美少業儒慷慨有大志時鄭成功屯兵臺灣承父志圖復明祚閩省下游多爲所據巡撫吳興祚檄委討之任俊投筆從戎一戰解泉州圍旋克復永春州德化縣追至臺澎以次廓清積功授左都督改游擊鎮雲南久之擢廣東副將調陝西興安鎮總兵任俊以書生能退敵多立奇功歷官滇粵秦諸省皆振振有聲恩威並濟尤愛民軍行申明紀律所過秋毫無犯士民皆勒碑頌德年五十六卽乞歸優游林下者二十年布衣

蔬食恬如也尋以天子加恩老臣授正一品誥命追贈四代榮  
祿大夫

楊振綱字明憲康熙壬午舉人授詔安教諭修葺文廟崇聖祠及  
明倫堂時進諸生與講明敦品修行士習不變庠中有兄弟爭  
產者與令謀於庭令延振綱至欲責之振綱從容曉譬授蘇普  
明事諷之庠士兄弟感泣至以產相讓尋擢泉州府教授詔人  
爲豎德教碑振綱工詩古文詞汪洋迤演著述甚富有半園詩  
文集六卷芥庵筆記十二卷讀史管窺八卷

黃世樞字拱北乾隆庚辰進士授兵部主事陞員外郎命充冊封  
琉球國王正使清廉自飭行李蕭然既歸授雲南景東知府有  
古田縣志

卷之二六

列傳

十六

循聲後林殿撰鴻年封冊琉球陞辭時上猶以宜法黃世樞爲  
訓蓋其清操著聞久矣

方祚隆字棟吉郎中彥楨之裔以歲貢任德化訓導教士以崇本  
黜華爲務旋攝縣篆以慈惠稱居官十六年歸時惟古劍一函  
龍潯宦稿一冊而已年八十一妾李氏舉一子大笑而逝後李  
氏亦殉節以死傳見烈婦

丁仕信字未能以歲貢任政和訓導素積學教士有法學使廉其  
才檄署訓導未幾解任卒於家

卓昂字采士康熙辛卯舉人授荔縣令歲大旱甫蒞任卽大雨人  
稱爲隨車雨居民數被火患昂捐薪米按戶賑之民賴以甦杜



苞苴省徭役尤以興學勸農爲急務每當春夏輒巡行阡陌促民耕作曰爾仰事俯育之資俱出田間豈容汝惰耶公餘勗諸生以立品砥行爲本又言作文立言須學古通經方有定力風化爲之一振尋以病乞休士民德之爲立去思碑著有孝經衍義一卷

姚又崇字宏濟以歲貢授莆田訓導以維持風化爲己任以有子當升哲具文申詳學使旋格不行後禮部尙書徐元夢奏請與其議合部文到日正值秋祭又崇奉有子木主躋堂成禮著聖世芻蕘以志喜秩滿陞歸化教諭旋以老乞休年九十卒子丹墀辛卯副榜亦好學能文

## 古田縣志

卷之二十六

列傳

十七

陳安策字又誼以拔貢任趙州判適永清河決奉命辦賑安策按戶口以周給之使民受實惠倥偬奔走日不暇食有勸以加殮者曰饑民嗷嗷待哺吾其忍下咽乎又往欒邑捕蝗晝夜疾馳三百餘里卒撲滅之陞易州同知但歲歉領帑以賑猶不給欲申請則迫不及待遂捐俸以繼之所存活甚衆後以勞瘁卒於官

藍孫璿字維義號虞亭雍正己酉明通會元授山西懷仁縣令以經術爲吏治所在有循聲生平學問淹博善屬文書法尤勁歸田後爲辛邑令聘修縣志

甘國寶字繼趙一字和庵少習文後應武試雍正己酉科武舉癸

丑曾魁由御前侍衛授廣東遊擊旋薦授湖廣洞庭協副將擢  
貴州威甯鎮總兵移山東歷江南浙江及南澳海壇又調臺灣  
鎮掛印總兵御批云此係第一要害非才幹優長識見明徹者  
不能勝任臺地番漢雜錯國寶蒞任嚴疆界謹斥堠臺民賴以  
安治臺日久教番民明禮義務耕種乾隆二十六年擢福建水  
師提督嘗謂僚屬曰防陸者不可處於家防海者不可處於陸  
日坐樓船督率小舟邏緝雖風濤澎湃弗避也賜戴花翎後因  
被議權雲南開化鎮總兵時緬甸萌逆制府以國寶威名素著  
移鎮永甯以制之緬甸帖伏後又以廣東黎番殺掠崖州及陵  
水安定二縣復權鎮雷瓊卽日率輕騎趨五指山擒其酋事聞

## 古田縣志

卷之二六

列傳

十八

復授台灣掛印總兵六斗門苦盜久國寶計擒盜首董六治之  
盜遂絕迹三十二年擢廣東提督三十四年移福建陸路提督  
充本省閱操大臣奸民王天送倡亂覆鼎山購線選勇士掩捕  
無一遁亂遂平勤勞國事以病卒於官年六十八誥授榮祿大  
夫國寶雖歷官武職而關心民瘼行軍以不擾民爲宗旨在南  
澳時植歲歉捐俸採穀賑濟兵民惠州大水設廠施粥水退米  
貴復勸富民平糶衆無饑色生平樂善好施葬無嗣之兵反沒  
戍之骨施棺贈藥不倦雅好文墨每下車必訪其地知名士敬  
禮之善畫山水并指虎能傳其威鷲之神嘗署紙尾曰指頭生  
活相傳未達時里人有見猛虎當門臥者迫視之則國寶也爲

之愕然在臺作紀典以補府志所未及卒後六營十郡將校思慕其遺愛建祠尸祝之子六長維衡次維定三維榮四維清五維智六維善或授文官或膺武職皆能繼志述事以備國家之用人謂甘氏之盛未有艾也

葉標元字首乾乾隆壬戌進士授陵縣令時山左歲歉流亡載道標元入境卽捐貲賑濟併詳請南漕以繼之嚴察吏胥侵蝕責革三十餘人躬巡四鄉按戶分給以極貧次貧大口小口科派之早出晚歸凡兩月餘民始漸有起色奔徙者亦聞風來歸次年農民因久荒乏穀種復請運穀散給歲乃有秋陵邑漕糧視他邑獨重士民懇請減額標元爲詳請於上官旋丁艱歸猶赴

## 古田縣志

卷之二十六

列傳

十九

郡面懇期必行民德之家居募建紫橋捐數百金以濟不逮功垂成而卒標元貌魁梧讀書以古人自期所爲詩古文詞盡去陳言書畫亦自成一家著鳳山草堂詩文集三卷

林第先字及人以歲貢任興化府訓導性端謹以力持風化爲已任見諸生勸以敦倫飭紀道義爲重文藝次之有故家子游姓者豪右圖其屋不遂陰唆其族人誣告令退業第先力爲伸雪事得直士林德之值歲歉奉命勸諭紳富減值平糶又奉命勸捐人感其誠俱無不樂從上官以敏謹廉能褒之旋署教授致仕歸教子孫務實學構精芬書齋於逋山別徑築三休亭以自娛自題一聯云何敢云清白吏暮凜四知祇自信覺非子老宜

三休學者遂稱爲覺非先生卒年八十六遠近聞者多歌詩以挽之門人魏夢燭輯爲遺愛錄著有四書拾遺五經旁解竹窻詩草諸書

林夢龍字御占以歲貢司德化訓導性方正樸直於振興文教靡不竭貲殫力德化原穎泉郡學額十二名後改屬永春州部文錯填僅八名夢龍力懇學使咨復原額士林感之旋乞歸構疑舫亭於宅畔日與文士觴詠其中極一時之樂事云

陳喬檜字天木以歲貢任霞浦訓導時浦新設縣人文未振喬檜嚴立課程教以經義士始激勵知嚮學有某諸生被誣以曖昧事喬檜極力調護事得直人稱其能全士節致仕歸卒年八十

## 古田縣志

卷之二六

列傳

十九

五

翁文周字玄卿以歲貢授同安訓導性嚴介篤於孝友以經學誘掖後進嘗謂諸生曰讀書人不能遵聖言正心身而徒務強記矜博洽作文章以取青紫安得不與道日遠乎後卒於官邑令哀其貧與邑人士共賻其喪以歸

林輪字元朱諸生陳清端公修文廟建文昌閣稔公學行使董之并悉其家世因贈一聯云世守儒風千古調堂環玉樹一家春蓋紀實也

陳畿棟字鳳士以選貢授安溪訓導性恬靜謹厚士有武斷鄉曲者力抑之不少假學宮年久頽壞畿棟捐貲修葺之巡撫趙公

以黌宮生色榜其齋

林步青字純齋諸生精古文善誘掖後進士林慕之

林渭起字非六以歲貢任壽甯訓導博聞強識年逾七旬與諸生  
論文竟日忘倦建文昌閣以課士所造就甚衆尋以病乞歸卒  
年八十有二

陳昌謨字爾選以歲貢任甯洋訓導性嚴正人不敢干以私其課  
士尤以崇實黜華爲務士多化之

陳滌字湍川廩生應鄉試正考擬中亞元副考以屈置第二不若  
留作次科首薦滌以屯蹟名場故鬱鬱而終子禎能繼父志登  
賢書孫芳春諸生陶情詩酒不樂仕進著有嘯雲山房詩草

## 古田縣志

卷之二六

列傳

二一

陳名熿字學朱以選貢任華亭主簿有惠政尋以病乞歸邑令議  
立社倉名熿先捐穀以倡之又於凶年減值平糶以惠貧民復  
捐民田爲正音書院膏火今充義學鄉人稱之

趙舜年字太初又字則虞乾隆丁卯舉人授桂陽令嘗陰囑甲婢  
竊取鷄子倒誣乙婢舜年親鞫之略問甲婢甲誣乙詰乙婢乙  
詞阻威之以刑戰慄不敢辨舜年曰雞子之竊我所知今乙婢  
懾於刑而誣服然後知折獄之不可以刑求也自是治獄加慎  
民隱畢宣有何氏子與姑之女指腹爲婚何氏家中落女父欲  
將女改適何氏訟於官舜年鞫問女父以何氏家貧不事生業  
未能畜婦爲辭舜年曉以大義謂何氏子能讀書乃四民中第

一生業不宜以貧悔婚女父復難之曰必欲娶女須盡年終得  
列青矜則可舜年許之是歲縣試拔何氏子爲第一得完娶士  
林德之其他勤政愛民類如此巡撫李湖以醇正精勤薦於朝  
旋乞休歸卒於家光緒間何氏之曾孫名鼎者來攝邑篆猶登  
堂拜謁感趙令之舊恩焉

莊向珠字餘齋又字以溥乾隆壬午副貢授監利縣丞歲大旱有  
富家湖可灌田千餘頃民困甚求分潤於湖主百計不能得因  
捐貲八百金求向珠判給向珠受金以獻湖主勸以湖濟人湖  
主允之辭金不受向珠歸語人曰民方苦旱金雖樂輸亦出於  
不得已今湖主既不受吾忍受此增我民累乎卽以原金還各

### 古田縣志

卷之二十六

列傳

二二

捐戶民感之

林國樑字樹昂舉人任湖北大冶縣時有純儒循吏之稱歸里後  
重宴鹿鳴鄉里榮之

丁又顯雍正武進士御前侍衛授鳳陽大河二衛守備歷著功績  
林雲乾隆庚午武舉貌雄偉有膽識會試不遇滯京師某親王一  
見與語奇之謂可大用爲之延譽推薦以衛千總洊升十三級  
官至浙江提督甲午己亥兩典武鄉試異數也

林承昌字弈偉號文峰乾隆丙子科武舉以千總陞授海壇南澳  
銅山守備擢游擊管帶提標兵船五營尋進京引見陞福建銅  
山營叅將統帶七營前後出洋緝匪甚力匪氛因而稍戢旋以

熟悉海務爲上峯所器重陞閩安協鎮調台灣安平協擢浙江定海總兵代者未至仍攝台安平協印務五月海寇蔡牽竄台灣承昌引兵出洋迎擊敗之捷聞賞戴花翎并賜玉翎管玉搬指荷包等物將赴定海任而台南北路漳泉民間蔡逆乘間劫掠提督王德祿以承昌威惠著聞兵民感戴奏留鎮守兼署台澎掛印總兵旋卒於官子朝聘性慷慨有才略居杉洋村有大盜李某素暴橫居民患之朝聘集同志三十人以計擒之送入官論如法其患遂除納貲以九品分發浙江補衢州司獄與王有齡劉韻珂鹿澤長善談天下事措置得失有遠識道光庚子夏英艦擾浙朝聘參行營機務辛丑代理餘姚知縣適英艦迫

## 古田縣志

卷之二六

列傳

二三

城朝聘單騎却之奉旨以忠勇可嘉升知縣加六品銜賞藍翎甲辰入都引見召見三次升定海同知尋兼署總巡水利通判卒年四十有三當晉京時首相穆彰阿方嚮用使人示意謂往謁當授引朝聘謝不往及召對皆稱旨上謂可大用將有不次之擢穆相沮之一日上問朝聘以林則徐是否同宗朝聘奏稱臣與則徐同姓不同宗上又問林則徐爲官何如朝聘奏稱臣入京道經江南沿江士民皆稱林則徐是好官頌德者甚多上意不懌然卒諒其直當是時禁烟事決裂文忠方謫戍王相國鼎湯協揆金釗皆以死生去就力爭不能得朝聘以末僚敢於上前陳正論聞者悚然其生平富膽識勇於有爲齋志以歿天

下惜之

張鴻字瑞章嘉慶戊午舉人歷任江蘇宜興南匯溧陽金壇華亭  
崑山諸縣俱有政聲先是阜甯水大府議賑檄鴻往勘鴻親履  
鄉村剔除夙弊金壇旱鴻捐廉倡賑金壇人以經理規條勒碑  
明倫堂以爲法其賑溧陽也於城外設灶百餘爲粥以食民松  
江海塘壞費金數萬築之不成鴻奉檄往督工堵築五閱月而  
竣衛田數十萬頃有安全者南匯豪猾吏也爲逋逃藪官民苦  
之鴻以計召全欲杖斃之全願捕罪人自贖盜賊奸民爲之斂  
跡十七年河南滑縣奸民不靖時百齡巡撫河南駐節徐州防  
禦奸匪以鴻廉明檄往慮囚鴻平心按覆半多流民平反數百

古田縣志

卷之二十六

列傳

二四

人道光三年補興化知縣地低多水患鴻經畫年餘鬚髮盡白  
以病告歸月餘卒

鄭鏞字諧石道光戊子舉人授浙江天台令咸豐末土匪紛擾鏞  
飭四鄉練團自保偵匪類所聚率官軍合鄉團力勦之未期年  
匪患悉平上官嘉其能調授松陽令天台民赴省乞留不果去  
日父老餞送十數里外如失慈母冀太史濬撰去思碑紀其績  
令松陽亦如之癸卯丙午鄉試皆充同考官所得悉知名士旋  
乞休歸卒年七十有二

丁用之字行卿道光庚子恩科第二名舉人大挑一等授廣東靈  
山令調合浦時適丁洪楊之亂土匪紛起用之素有才略率官



兵捕匪百餘分別首從嚴懲之匪患稍息上官稱爲能吏方倚平賊未幾卒於官用之家本素封入官以清廉自飭用資多取給於家宦囊匱乏家業亦耗損殆盡士民憐之爲賻其喪以歸魏崇寬字靜夫以恩貢任尤溪訓導整飭學風爲士林所矜式調甯化教諭值太平天國之亂解職歸卒於家

謝銘勳字鼎亭咸豐壬子舉人同治辛未大挑一等署廣西崇善令調授維容性樸直以廉隅自飭折獄務得其情時有蔣生幼定聘徐氏女後蔣長成家中落徐氏悔令退婚控於官銘勳察知其情適縣試愛蔣生才拔列第一旣而謂徐曰如此佳婿雖貧何妨令資助以金以綵輿送女往將家成婚士林感之光緒

## 古田縣志

卷之二六

列傳

二五

五年洪楊餘黨攻縣城三里之鹿寨墟銘勳率親兵合營卒及各鄉團圍守一晝夜次日黎明進勦斃匪四十七人餘驚遁六年平頭墟四十八衝有匪羅老來者聚衆數百人四出劫掠鄉人患之復勒兵密約各鄉團偵獲匪首以獻繫之獄民賴以安上官嘉之以卓異保運同銜丙子鄉試充同考官攷覈精密時稱得人旋無疾卒於官士民哀之子三維駒廩貢生維駟附貢生廣東甲子分司維駱歲貢生皆有文名

曾灼先字華谿以拔貢授廣東花縣令仁慈愛民絕苞苴杜請託嚴防吏胥之舞文者暇則臨池學書不輟秀勁可人旋調澄邁未幾卒灼先家故貧在官俸餘悉分給親族戚友殆盡囊橐蕭

條淡如也

陳誠字嵐秋同治順天舉人戶部郎中總理各國事務衙門軍機處行走簡放江蘇蘇松泰道辭旋授山東登萊青兵備道賞戴花翎德宗召見兩次稱旨敦促赴任未行卒於京師弟俊字杰夫襲雲騎尉閩安水師守備甲申中法之役防守塢口卒於軍子光勳字綏伯光緒丁酉舉人由工部主事出知江蘇鹽城令楊景昌光緒己卯科武舉庚辰聯捷進士以御前侍衛陞授四川夔州協左營調馬邊協左營巫山營都司旋挑入武備學堂畢業以游擊補用加叅將銜光緒三十四年英教士入馬邊土蠻界大梁山游歷被害川督趙以巽以景昌負威望悉邊情奏著

古田縣志

卷之二十六

列傳

二六

馬邊協鎮督辦馬邊夷務兼統領常備軍六營以功加總兵銜實授馬邊協鎮數年上下恃以無恐民國四年督軍兼省長陳宦薦署川北鎮守使卒於官年六十三

徐應麒字仿石號金鑿清同治癸酉科由廩膳生選拔貢甲戌廷試一等一名欽點七品小京官刑部直隸司行走因父病假歸親侍醫藥父卒哀毀盡禮服闋擬卽進京供職又顧萱堂年邁不愿仕進在家供菽水訓諸昆者二十餘年孝友聞於鄉黨善屬文工書法胡令慶榮索其書八幅懸於水口大公館吳大主考蔭培校閱省秋闈見而嘉之攜取而去由是書名益噪咸羨其不亞吳肅堂殿撰云

陳賓寅字欽如號明午父邑庠生星輝兄增生謨皆省居教讀賓  
寅少隨父兄受業天資聰敏學業大進家本寒素因急於治生  
改營海鮮業乃天欲玉成其才貿易虧折資本蕩然二十七歲  
復發憤就學不數年應縣試拔取案首入泮民國初畢業於福  
建師範簡易科學校並錄取選士適妻舅林紹年託運家眷赴  
河南賓寅復入學習法政以典史起家辦事出力洊升河南中  
牟縣縣長改廣西河池縣縣長嗣復調任山西之陽曲縣朔縣  
山陰皆有政聲旋升任綏遠道尹兼政務廳廳長國民政府成  
立改任綏遠省政府委員兼民政廳廳長綏遠省縣長考試典  
試委員國民會議代表綏遠省選舉事務所總監督綏遠全區  
自治籌備處處長綏遠全區村政處處長山西運輸副司令均  
政績卓著篤宗族親舊所得廉俸周恤不遺六十三卒於官子  
二皆大學畢業女一適某

## 古田縣志

卷之二六

列傳

二七

